

قبل ما تزوج، كنت عابشة مع عيلتي في بيت عربي قديم في منطقة اسمها جوبر. كانت حياتنا حلوة و كنا قريين من بعض- عشنا في بيت كبير مع أعمامي وزوجاتهم. كنا ستة، 3 أولاد و 3 بنات، و كان معنا اولاد عمومتي. لما فكر بهديك الأيام بحس بالسعادة. كانت أيام عادية و عفوية بدون الحرب و همها. حسينا بالانسجام و الحب بيناتنا. كنا مبسوطين.

كنت ألعب مع أولاد عمي - كنا نسهر بالليل و نزور الجيران وقت كانوا يقطفوا أوراق الملوخية و كنا نروح لعندهن و نساعدهن. كان عند جيرانا التانيين شجر كرز و كنا نروح و ناكل كرز، كانت حلوة هديك الأيام ما رح انساها.

بعدها، كان عندي مسؤولية أخواني الصغار ؛ كانت امي تطلع من البيت و تتركني مسؤولة عنهم لأني كنت الكبيرة. عشت شوية أمومة بهالطريقة. كان عمري 13 سنة. و علمتني أمي كيف أطبخ و أنظف و كيف دير بالي عأخواتي. و كنت مبسوطة. تحملت مسؤولية البيت بس ما كنت فكر إنه شغل لأني كنت مبسوطة.

كنت روح عالمدرسة بس للأسف ما كملت دراسة. بهذاك الوقت ما كنت حاسة بأهمية التعليم و ما حبيته. كنت بدي أشتغل بصالون تجميل لأني كنت حب شغل التجميل كثير. كنت اتدرب على أخواتي الصغار إني أعملهن شعرهن. لما خلصت مدرستي الابتدائية (صف سابع) قلت لأبي إني بدي أترك المدرسة وبدي أشتغل بصالون تجميل. و أبي وافق.

و بهذاك الوقت الحكومة كان بدها تعمل اوتوستراد بالمنطقة اللي كان بيتنا فيها. كانت هاي نقطة تحول بالنسبة إلنا. أبي كان عنده قطعة أرض في الغوطة الشرقية، بنينا بيت هناك مشان نتقل. و انتقلنا من المدينة للريف، و دمروا بيتنا القديم مشان يعملوا الطريق. تغيرت حياتنا. صار في بيت مستقل لكل واحد من أعمامي، و عشنا منفصلين.

و كان في فرق ثاني كبير: إنه في الريف كان في تعقيدات بالنسبة إنه النسوان يكون إلها حرية تشتغل أو تطلع من البيت. كان عمري 14 سنة، و كنت مفكرة أن ابي رح يخليني أشتغل بصالون. كان في صالون جنب بيتنا القديم و كنت بدي اشتغل هناك، بس لما طلعتنا من المدينة، ما كان في صالون بكل المنطقة.

كل شيء تغير. ما كان من الطبيعي إنه الست تشتغل و إذا اشتغلت الناس بتحكي عليها. كانوا محافظين كثير ؛ الستات كانوا يلبسوا نقاب. و كانت المسافة طويلة لأقرب صالون، لغيت الفكرة و ما كملت تعليمي. و كمان ما قدرت طور موهبتي بالتجميل.

كبروا أخواني الصغار وكان دوري أكبر في مساعدة امي - وكانت إذا طلعت امي أنا دير بالي عأخواتي. كانت علاقتي قوية

نحننا هون؛ اطلعوا علينا

سوريا كانت بلد الأمان و الخير و سوريا فتحت بوابها لكل. سوريا كانت أمنا الحنونة و ضمتنا كلنا.

مع أبي؛ كان يعاملنا كأنا أخواته. أبي كان قدوتي ولساته هيك. ورح يضل قدوتي لآخر يوم بعمرى. كنت أقرب لأبي من امي مع انهم يقولوا إنه البنات بيكونوا أقرب لأمهن. كنت احكيه اذا كان في حدى عاجبني وكان يعطيني نصيحة: كان يقلي إن الحب ما بيشتري خبز وكان يحكي لي عن تجاربه عن الحب. كان في عقوبة للبنات إذا حبت في سوريا بس أبي كان ديمقراطي. كنت احكيه كل اشي مع إنه كان شديد كثير. وكان يسمعي. وقت فكر شو كنت احكيه بستغرب إني ا كنت أحكي لأمي هاي الشغل.

نقطة التحول الثانية في حياتي كانت إني تزوجت. كان عمري 16 سنة. كان سنة 2002. أنا ما بلوم أهلي عهالشي بس بحس إنهن تسرعوا. أول ما تقدملي زوجي للزواج، رفضته تمامًا. بس بعدين انخطبت. كثير ناس تقدمولي بس مثل ما بنحكي، كل شي نصيب.

زوجي يقرب أمني، بيكون ابن عمها. لما امي خبرتني أنهم بدهم يجوا يشوفوني، كنت رافضة فكرة الزواج منه؛ ما كان بدي إياه. بس امي حكلي انه أعتبرهم جاينين زيارة وأنه لازم أشوفه بالأول.

كان عمره 31 سنة، ضعف عمري. قعدت معه وتحديثا وحسيت شوي بارتياح، وقلت إني لسا ما بدي اتزوجه. ورحت عالمطبخ مشان أعمل قهوة ولحقنتني أخته وسألتنني إذا حبيتها. قلت لها إني موافقة. وامي كانت مصدومة لأني خبرتها قبل إني مو موافقة اتزوجه وخبرت أخته بالعكس. لما سألتني أمني شو صار، قلتها ”ما بعرف بس حاسة براحة“.

بهذا الوقت ما كنت بعرف كل شي عن الزواج. كنت بعرف بنات من الحارة مخطوبات وكانوا يقاهروني لما يشوفوني. يمكن كان بدي انخطب مثلهن، كنت مو واعية. عشت مرحلة ”خطيبي جاي ولازم أعمل شعري وبدي ألبس“.

كان هذا بسنة 2002. وهون صارت المشكلة الكبيرة. ما كنت واعية تمامًا للي كان عم يصير لما تزوجت. كان زوجي أصغر واحد بعيلته وكان عنده أخت أكبر منه. عشت مع أهل زوجي بعد ما تزوجت: كان البيت فيه غرفتين نوم، غرفة لحماتي وغرفة إلي.

بعد الزواج وعيت على كثير أشياء، مثل إني تزوجت شخص أكبر مني، وإني عشت مع دار حماتي، وإني ما عشت طفولتي. حرمت حالي من حقي إني أعيش طفولة. في بيت أهلي قبل الزواج، تحملت مسؤولية اخواني وكان كثير بكير علي، وبعديها مع زوجي وأخواته وحماتي، كان مثل كآني انضربت على راسي وصحيت! ووعيت شو اللي عملته بحالي: كانت حماتي قاعدة على كرسي متحرك، وكانوا بنات حماتي يزورونا يومًا ويحوا ضيوف كل يوم - ما كنت بعرف انا عروس ولا شو!

كان زوجي كبير بالعمر وما تقبل فكرة إني كنت صغيرة. عشت أيام مراهقتي وأنا متزوجة بس هو ما تقبل هالشي. ما عمره فكر إني كنت طفلة. ما فهمني - كل ما عملت اشي ما بيعجبه كان يقلي ”عيب، أنت هلاً متزوجة، ما لازم تعملي هيك“، وكل مرة كان يقلي هالكلمات، كنت اتراجع لورا. وبدل من إني أعيش حياة مليانة بالسعادة والاستقرار مع زوجي، حسيت بالعكس.

ما حسيت إنه احتواني، على سبيل المثال لما كنت اطلع معه، كنت بدي امسك ايده، كنت بدي أحس إني محبوبة بس هو ما كان يوافقني؛ كان يقلي ”لا، عيب نعمل هيك“، كنت فكر أنه زوجي، مو صاحبي!

كان عندي مشاعر بس هو لأ. مرة اتخانق معي لأنه كان قاعد في الحديقة ورحت لعنده وقعدت جنبه ومسكت ايده. قال ”ولو حدى شافك شو رح يحكي عنك؟“. ما كان مسموح لي عبر عن حبي أو مشاعري، وما كان يعجبه وقت كنت امزح بالبيت. حملت بعد شهرين من زواجي، كل مشاعري تحولت للطفل.

عندي بنتين وولد. كانت حياتنا بسيطة كثير. زوجي ما كان عنده وظيفة ثابتة، كان عنا أكل. حسيت إني كبرت بسرعة. قدرت أحمل مسؤولية إني راعي وضع زوجي واعنتي باولادي وطعمهم وأساعدهم في دراستهم. حسيت فعلاً إني بتحمل مسؤولية كبيرة ما بقدر أوصفها. حسيت إني كبيرة بالعمر، إذا بتشوفي أولادي، ما بتحزري انهم اولادي، ورح تفكري إنه بنتي الكبيرة هي أختي أو رفيقتي. ما بدي بنتي تعيش اللي أنا عشته - أكيد كان زواجي مبكرًا. البنات ما لازم يتزوجوا قبل 20 سنة.

أنا وزوجي في مكانين مختلفين. بحاول معه بس ما بحس إني مرتاحة داخليًا. فاهمة أنه هلاً هو كبير بالسن وأنا لساتني صغيرة، بس هو لساته بده يتحكم فيني. حرمني من زيارة أهلي وضغط علي كثير اجتماعيًا. ما فكرت بالطلاق، لأن أهلنا علمونا أن الطلاق هو الحل الأخير. في مثل بيقول قيرك هو بيتك، لكن هالحكي غلط. غلط ما تخبر بنتك أنها بتقدر تشكي من زوجها إذا صار شي مو منيح، بس انا كنت خائفة إني احكي، كنت خائفة من الطلاق.

كانت علاقتي مع أولادي حلوة كثير، كان عندي شي اهتم فيه والتهني عن زوجي.

وفي سنة 2011 بلشت الأحداث في الغوطة، بعيد شوي عن المكان اللي كنا فيه. كنا نسمع الأصوات وسمعنا عن المظاهرات. وبلشنا نخاف. كانوا يقتحموا منطقتنا دايمًا وكان في كثير من قوات الأمن هناك. كنا نخاف كثير لدرجة أنه كنا ننام بأواعينا مشان نكون مستعدين إذا اقتحموا البيت بالليل. ما كان في أمان، كنا مقيدين كثير.

لما كنا نسمع الأصوات كنت جمع أولادي ونقعد بزواية وحدة بالبيت. شعور ما بقدر أوصفه. في مرة دقوا الباب وطلع زوجي ليحكي معهم، كانوا يسألوا عن حدى. بعد هيك خبرني زوجي أن صعب نبقي وكانت فكرة السفر في راسه.

بهذا الوقت كنت حامل بابني الثالث. ولدت بأول الأحداث. كنت قلقانة عاولادي. لما كنا نسمع أصوات التفجيرات وإطلاق النار، كنا نفيق مرعوبين ونصير نبكي. كنت اخاف كثير عليهم بس ما كنت عارفة شو أعمل. كنت محتاجة حدى يهديني. مرة كنت عم بعمل مكدوس وكنت بدي حط وزن فوقه لأكبسه فحطيت جرة الغاز فوقه ولما رحنا عالنوم يمكن أنزلت جرة الغاز ووقعت وعملت صوت عالي كثير، بتذكر إني كنت نائمة ووقفت وما بعرف كيف بس لقيت زوجي وقف قدامي وضممني - فكرت إنه في قبلة وقعت على بيتنا وكنت صرخ على زوجي وبقله: الاولاد!

ما حدى بيقدر يتخيل كيف كان الوضع بالنسبة إلنا! أي صوت كان بخوفنا كثير. المنطقة اللي كنت عايشة فيها صارت منطقة عسكرية. كان في جسر قريب منا يوصلنا منطقتنا عن الغوطة، والقوات العسكرية مركزت على هاد الجسر. تصاعدت المشاكل لأنه إذا كان المتظاهرين يبطلعوا من الغوطة، كان الجيش يوجههم ويوقفهم، أو يطلقوا النار عليهم أو يعتقلوهم. وكان في قناسة على أسطح المباني القريبة. كنا محوطين بالقناسة، وكانت الشوارع مليانة بالدبابات، وكانت قوات الجيش في كل مكان في منطقتنا.

بتذكر مرة كنا على السطح وشفنا مظاهرة جاية بعدين سمعنا طلقات نارية تطلق عليهم، فركضنا بسرعة ونزلنا عالبيت. كان زوجي خايف يعتقلوه أو أنهم يغتصبونا أو انه واحد من الاولاد يتأذى أو يتأثر. فكرنا في السفر وكنت محتارة بين إني وافق عالسفر أو أرفض.

كانت امي ضد إني سافر، وطلبت مني إني أبقى وأن السفر مو هو الحل، كانت داها تقول "إذا طلعت من دارك، بيقل مقدارك".

كنت عنجد ضايعة، اقترح زوجي إنه نطلع لمدة شهرين، لحتى تستقر الأمور وبعدها بنرجع. وكنا رح نطلع لمدة ثلاث شهور كحد أقصى، وبعدها بيرجعني عالشام. وافقت.

عشت بالأحداث لمدة سنة وحدة.

توقف زوجي عن العمل وأنا وقفت ابعت أولادي بالمدرسة. كنت خايفة طول الوقت، كنت خايفة من القصف أو إطلاق النار العشوائي. وكنت داها خايفة عأولادي.

كانت أيام الجمعة مقدسة للسوريين، كانوا يطلعوا سيران ورحلات. بعد الحرب تحولت أيام الجمعة إلى عبء لأن المظاهرات كانت تصير يوم الجمعة ويصير أشياء سيئة. كنت اخد أولادي لبيت أهلي من يوم الخميس ليوم السبت. كان صعب كثير بالنسبة إلنا. وصلنا لمرحلة أنه الأكل المخزن بلش يخلص. في بعض الأيام كنا ناكل زيتون أو شي كان عندي في البراد، وبالآخر ما كان في لحمة أو دجاج أو أنواع ثانية من الأكل.

وأنا كنت حامل.

بتذكر مرة كنت بدي أطبخ وكا كان عندي سمنة أو زيت لأطبخ فيه. كان عندي حبتين بطاطا. واولادي كان بدهم ياكلوا. كنا نحكي عن اللي كان يصير جوى حيطان البيت بس، لأنه ما كان فينا نحكي براة البيت. سألنا حالن ليش الرئيس ما عم يوقف اللي بيصير وليش عم يسمح بإنه الدم يسيل. بالأول كنا ندعم بشار، كنا معه لأنه ما عمل شي غلط. بس بعد كل الدم اللي سال، بلشنا نفكر أنه بإمكانه يوقف اللي عم يصير. بيقدر يوقف الدمار، وهيك صاروا الناس اللي كانوا معه ضده.

بعدها زوجي حكى "بيكفي". اخته ساعدتنا لنشتري تذاكر الطائرة ورحنا عالطار. بس لما وصلنا لمكتب ختم جوازات السفر، انرفضنا؛ ما سمحولنا نساfer.

النظام ما كان بده حدى يسافر، العذر الأول كان إنه تأخرنا. بنت حماي أجلت التذاكر لوقت ثاني. ورحنا مرة ثانية - وكمان مرة ضبيت الاغراض، وكمان مرة خبرونا إنه ممنوع نساfer. خبرهم زوجي أنه ضروري يسافر لأنه محتاج توقيع أخته على أوراق ورتة، قالوله إنه بيقدر يسافر لحاله، بس أنا والاولاد ما فينا نساfer. رجعنا للبيت وبعدها سافرنا بالبر، ولما وصلنا الحدود ما سمحولنا نفوت. رجعنا للبيت مرة ثانية.

حاولنا نطلع مرة كل ثلاث أو أربع أشهر سنة 2012. وضبيت الاغراض أكثر من مرة.

في المحاولة الرابعة، زوجي حكى لأخته إنه تبعتلنا دعوة وبعثت، وخبرونا نفس الشي - إنه بس هو بيقدر يروح. بهذا الوقت قلت لزوجي "مليت من ضب الاغراض وخلص".

حسيت أنه ما في أمل إني سافر، زوجي حكالي إنه نجرب مرة أخيرة وإذا ما زبطت، رح نضل. وهالمرة، أخذت شوية أغراض بس. بتذكر إني لما كنت عم بودع أهلي قتلهم "رح أرجع، رح نوصل الحدود وأنرفض وأرجع". ما ودعناهم منيح.

وصلنا الحدود. كان في طابور ناس كان بدهم يمرقوا قبلنا. كان في منهم اللي بيبيكي ومنهم قاعدين عالارض، وكانت سيارتنا هي السابعة في الطابور. السابق نزل وراح يحكي مع حدى وحكوله إنه يص السيارة بالزاوية كأنه عم يستنى حدى. بقينا هناك لفترة لحتى اجى زلمة وحكى للسابق إنه يفوت، فتنا وختمنا الجوازات. وطلعنا.

كان كأني اصدمت وأنه الموضوع صار جد. هلاً صرنا على الأراضي الأردنية. اتصل فيني أبي ليضمن علينا وخبرته إنه مرقتنا. كنت خائفة ما كنت عارفة شو عم حس، أبي صار يدعيلى وقلبي إنه بيتنمنى إنه نرجع قريباً. كنت أبكي لأني حسبت إنه صار الموضوع جد هلاً. كنت أبكي طول الوقت.

أصعب جزء بهاي الرحلة هو إني تركت أهلي. وتركت بلدي كمان، البلد اللي عشت فيه وكبرت فيه. **نفس بلدي اللي خلاني أعيش فيه.**

جينا لهون وبقينا عند بنت حمائي.

لساتني بتذكر كثير من المواقف الصعبة في سوريا. مثل عند الحواجز، النظام ما كان يحترم إذا كانت امرأة أو رجال كبير. كان شي بيرحني إني أوصل لبنت اهلي بدون ما اتعرض للإساءة لفظية أو لسوء معاملة. كانوا يقولوا كلمات مو منيحة أو يعاكسوا أو شي مثل هيك، والرجل اللي بيكون معك ما بيقدّر يحكي أو يعمل شي. كانوا يعملوا هيك قدام زوجي، لأنه إذا زوجي حكى شي، ما كنا بنعرف شو ممكن يعملوا فيه. كانوا حاملين سلاح، ممكن يقوضوه!

وحيراننا تعرضوا للانتهاكات. مرة كانت الساعة 6 الصبح، كنا نايمين وسمعت صوت بالحارة. كان في شي مو طبيعي عم يصير، فتحت الشباك وشفّت العساكر. كانوا ماسكين واحد من الجيران وكانوا إيديه مربوطين ورا ظهره وكانوا عيونهم مغطين وكانوا عم يجروه وعساكر تانيين كانوا يلاحقوا واحد تاني من الجيران.

كنت خائفة كثير، وكانت الشوارع مليانة بالعساكر. ما بعرف إذا حدى وشى عنهم أو كانوا في الحارة. حسبت إنه الخطر كثير قريب علينا وإنه ممكن يصير هيك مع زوجي بأي وقت. أخذوهم واعتقلوهم لفترة وضربوهم بعدين أطلقوا سراهم.

وبعد ما وصلت الأردن، عرفت إنه ابن عمي تصاوب وتوفى. كنت دير بالي عليه وهو صغير - كان مثل أخي. اتضايقت كثير. خبروني أنه كان قاعد مع رفقاته برا بيته وكان في طائرة عم تقوص من فوق. هاد كان في الغوطة الشرقية. وهو ما

كان إله علاقة بشي، الطائرة كانت عم تقوص عشوائياً. وكان هو الشخص الوحيد اللي تصاوب. وكان وحيد أهله. كان اسمه وائل، الله يرحمه.

بالأردن، كنت أستنى الأيام تمرق مشان نقدر نرجع. لكن المشاكل زادت في سوريا ومعها زاد خوفاً على أهلي. وبعد ما وصلت الأردن بفترة، سمعت عن القصف الكيماوي بالغوطة الشرقية، ولما صارت مذبحة الكيماوي. هاد كان بسنة 2014. حاولت اطمن على أهلي بس ما كنت قادرة أتصل فيهم لأنه ما كان في تغطية للشبكة. كان القصف الكيماوي في منطقة اسمها زملكا وكانت بعيد عن مكان سكن أهلي، والحمد لله أنهم ما تأدوا.

أهلي ما شافوا القصف الكيماوي بس سمعوا عن الضحايا. أهلي ما طلعوا من البيت لأنه ما كانوا بدهم يكونوا حوالين الغاز. كان في كثير ضحايا، الله يرحمهم. في ناس ماتوا وهم نايمين لأنه القصف كان بالليل. توفي زوج بنت حمائي مع معظم أفراد عيلته من قصف الغاز. مات 20 شخصاً من عيلته.

أنا طلعت من الحرب بس الحرب بقيت معي لأني تركت جزء من روحي هناك.

أخي الكبير كان ساكن مع مرته في منطقة اسمها العباسية، وهي منطقة عسكرية يسيطر عليها النظام. هي المنطقة اللي بتفصل بين الغوطة الشرقية والنظام. أخي استأجر بيت مشان أهلي ينتقلوا عليه مشان المشاكل اللي كانت بالغوطة. قرروا أهلي ينتقلوا - صار صعب عليهم يلاقوا الأكل وما كان في كهرباء أو مي أو الاحتياجات الأساسية.

بالأول أهلي بعثوا أخواني التين الصغار، اللي انا ربيتهم. أهلي طلبوا من اخواني الصغار يسبقوهم وإنهم رح يلحقوهم بعدين. طلّعوا إخواني واعتقلوهم عند حاجز تفتيش. كانوا أعمارهم 13 و 14 سنة. أخذوهم النظام. أخي الكبير عرف أنهم ما وصلوا المنطقة الجديدة. ما حدى من أهلي كان يعرف وين اخواني.

كانوا أطفال، 13 و 14 سنة! ما كان صابر شي في طريقهم، وقفوا عند حاجز تفتيش وشافوا هوياتهم وعرفوا أن أخواني كانوا طالعين من الغوطة. كانوا بدهم ياخدوا معلومات منهم عن شو كان عم يصير بالغوطة، فأخذوا اخواني لمركز أمني. اللي فهمته بالأخير هو إنهم انضربوا ضرب مبرح. واحد من اخواني حكى والتاني ما حكا لهم شي. فأطلقوا سراح اللي ما حكى، بس التاني، محمد، حكى بعد ما ضربوه. وطبعاً إذا ضربوا طفل عمره 14 أكيد رح يقول شو ما بدهم. ما بعرف شو قلهم بس ما أفرجوا عنه، بعديها أهلي صاروا يفتشوا عليه بمراكز الأمن.

آخر مرة راح فيها أبي يسأل عنه، أعطوه هوية أخي محمد وحكوله ما يسأل عنه مرة ثانية، وأنه توفي أثناء التعذيب. بس نحن ما شفنا جنته، أعطوا لأبي هويته وأغراضه. بهداك اليوم حكيت مع إمي وكنت عم بيكي وحكتلي إني ما اصدقهم، حكتلي إنه إذا ما شافت جنته ما رح تصدق إنه مات. كانت تهديني. أنا ربيت أخواني (محمد وأنس)، وكنت أهمهم الثانية، إمي خلفتهم وأنا ربيتهم!

قبل ما يختفي أخي، اختفى عمي، اختفى بطروف غامضة؛ كان زاير ببيت حماه وطلع من عندهم وما رجع عبيته. لسا ما نعرف إذا كان عايش أو ميت. بالأمل مات ابن عمي، بعدين انفق عمي، وهلاً أخي.

كان كثير لأتحمل. فتحت عزاء هون في الأردن لأني كنت شبه متأكدة أنه مات. وأنا اللي ربيته! لما زرت بيت أهلي أول مرة بعد ما اتزوجت كان كثير زعلان مني؛ ما رح أنسى أبدا. ضربني عابدي بالحفاية وصرخ فيي وقلبي ”ليش رحتي؟“ كان حكى لإمي قبل إنه بده يعطي زوجي فلوس مشان يرجعني. كنت أعمل كل اشي معهم، كانوا مثل اولادي. تأثرت كثير لما راح.

بعد 15 يوم من ما سمعت عن موت محمد، كان في 24 أبريل 2015، الساعة 6 المساء. مرت أخي اتصلت فيي وخبرتني أن في قذيفة وقعت عبيت أهلي وأنها ما بتعرف إذا كانوا عايشين أو لا!

فقدت عقلي. قتلها ”شو يعني ما بتعرفي إذا عايشين أو لا؟“، كنت كثير مخنوقة؛ كنت بدي أعرف شو صار بأهلي، أبي وأمي وأخي الصغير. عمي قال إنه كان قريب من مكان الانفجار بس قوات الأمن كانت محاوطة المبنى وما عم يسمحو لحدى يفوت. وطلب مني إني أصبر.

أنا كنت بالبيت همشي رايحة جاية بين الغرف، وعم بدعي الله أنه يكونوا أهلي بخير. صرت مثل المجنونة. بقيت طول الليل سهرانة وأنا أدعي وأقرأ قرآن. طلبت من زوجي كثير إنه يخليني أروح عالشام، بس بهداك الوقت إذا أي سوري رجع لسوريا ما بيسمحوله يرجع عالاردن. بس أنا كان بدي شوف أهلي حتى لو كان بيعني إني اخسر بيتي أو اولادي أو زوجي. كنت بدي شوف أهلي بعيوني.

تاني يوم اتصلت مرت عمي وقالت ”ما بعرف شو احكيك، العمر إلك“. وحكتلي كمان إنهم شالوهم من بين الأنقاض وإنهم ماتوا.

بهديك اللحظة تمنيت لو أنني متت. قالت ”ماتوا بس أنس لساته عايش“. جنيت وبلشت كسر الأشياء. سمع زوجي الصوت وقتلته ”لازم أنزل عالشام فوراً، أهلي ماتوا وأنا لازم أروح هناك“. كنت عم هزه وأنا بحكيه، ما كنت عم بفكر. زوجي ذكرني أنه إذا نزلت عالشام، يمكن ما ارجع لهون، بس أنا قتلته“ ما بدي أرجع، ما بدي أعيش معك بعد هلاً“. بهديك اللحظة كرهت زوجي لأني حسيت إنه هو السبب إني مش مع أهلي. قتلته ”إنت اللي جبنتي لهون وإنت اللي خليتني اخسرهم!“ بنت أخته كانت تحاول تهديني، بس ما كنت عم بتقبل أي حدى يعزيني.

انهرت وفقدت الوعي وصحيت لقيت في دكتور عم يحاول يفيقني. كنت عم اصرخ ونادي على بابا وكنت عم قول لأبي انه ما يتركني. اتصلت بابن عمي اللي بسوريا وقتلته أنه يصوري أهلي مشان أصدق أنهم ماتوا. وقتلته انه اذا ما رح سامحه إذا ما صوري اياهم. لما بعثلي الصور، ما كان شكلهم طبيعي، وكانت وجوههم عليها كدمات وتورم وكان في دم. كانت عين إمي منتفخة كثير وكان وجهها مغطى بالدم.

ولما كنت اطلع عصورة أبي، سألته ”ليش تركتنا؟“ طلبت من ابن عمي انه يصوري اياهم بالدفن كمان بس قلبي ”بيكفي تعذي حالك، ليش بدك الصور؟“ قتلته ”ما بيكفي إني مو قادرة كون معكم؟ صوري كل شيء وإبعثلي الصور“.

كانت ليلة الخميس، أهلي ما ناموا بالبيت بهديك الليلة بسبب العنف، بس قدرهم كان انهم يكونوا بالبيت هديك الليلة. كانوا مخططين يطلعوا، أخي أنس طلع بجيب سيارة. وهو عم يفتح الباب، وقعتت القذيفة عالبيت وهو انرمي لبعيد. وأهلي كانوا جوى البيت.

كمان بعثولي صور لأنس. بالأول ما قدرت أتعرف على شكله - فكرت انه هو كمان ميت، كله كان كدمات وجروح ودم. اتصلت فيه وسألته عن اللي صار وقلبي إنه ما بيعرف - انه صحي ولقى حاله بالمستشفى. أنس عاش أول صدمة لما فقد محمد اللي كان معه في الاعتقال والصدمة الثانية لما توفوا أهلي.

كثير صعب التفكير في موتهم. شو كان وجعهم؟ بشوا كانوا يفكروا؟ شو شافوا؟ بشوا حسوا؟ لما برجع بفكر بهديك اللحظة بتمنى أنه الزمن وقف لما كنا صغار ومبسوطين.

بعد ما غسلوهم بعثولي صورهم قبل الدفن. الكدمات كانت لسا مبينة. و ابن عمي بعثلي صورهم بعد ما حطوهم بالقرير. حسيت إني عم بخسرهم أكثر وأكثر، صحيح انهم ماتوا بس أنا حسيت أنه بعد دفنهم ما رح يكون في الهم صور تانية. رح يندفنوا تحت التراب وما رح اقدر اشوفهم بعد هلاً.

كرهت زوجي كثير بهداك الوقت لأني حسيت أنه هو كان السبب في كل شي صار، هو السبب انه بعدني عنهم، وهو السبب في إني تزوجت بكبر، وإني ما عشت معهم كثير. كرهته كثير لدرجة إني كرهت شوفه. كنت مستعدة أخاطر بفقدان أولادي مشان كنت بدني أروح أشوفهم. ما بقدر أوصف شعور إنك تخسر أبوك وأمك بنفس اليوم، شعور كثير صعب. بلشت أكره كل حدى عنده أم وأب وبلشتت أكره كل حدى بيحكي عن أهله.

من قبل كانت فكرة الطلاق بعيدة ولكن هلاً بتمنى إنه يصير. ما احتواني أبداً، حتى في أصعب المواقف. كان لازم يحسني إني بقدر استند عليه وأنه بيدعمني. ما عندي شي اخسره إذا تطلقت، خسارتي الوحيدة رح تكون اولادي، بس مو قادرة أتحمّل. أنا إنسانة ! بحتاج إنه يحس فيني لما يكون بأضعف حالاتي.

لكن وقت فكر مين المسؤول عن موتهم، النظام وبشار. لو فيني انتقم لموتهم، ما بقصر. لو بيحي يوم نحنا نحكم فيه على النظام ونسيطر عليه مثل ما هو كان مسيطر علينا كان عملتها. مش بس أنا ؛ مش انا اللي أناذيت لحالي ، في ملايين السوريين اتأذوا. في شخص مفقود أو ميت في كل بيت سوري.

لو بشار عم يتحاكم وحكموا عليه أقصى عقوبة، ما بيسوى دمة نزلت من عين أم بكت عابنها، أو زوجة بكت عزوجها. يمكن نقول إنه شوي رح نحس براحة، بس المشكلة هي أنها ما رح ترجع الي فقدناه.

المحاكمة ما رح تحقق العدالة، بس رح نعرف إنه البلد الي عايشين فيه ما في ظلم. نحنا عشناها وخلصنا، بس بدنا اولادنا ما يعيشوا الي احنا عشناه.

نحنا انكسرنا. كلنا عم نعاني من نفس الوجع، لأن كل بيت تضرر بطريقة معينة، كلياتنا عايننا من هالشي. بحس أنه كل السوريين بيعانونا من نفس الوجع. ما رح تلاقي سوري ما تضرر من الحرب.

هاد عملي اكتئاب وعصبية. في أيام، ما يكون متملة أي كلمة من أي حدى وبحس إني بكره عيلتي. هلاً أنا عم برفض كل شيء بحياتي وبس بدني أهرب وضل بعيدة. صرت وما زلت حدى ضايع.

أخذت جلسات في مركز CVT ، وقبل الجلسات كنت مثل الحيط المهذوم. كانت الجلسات مفيدة كثير واستفدت من التمرينات الي تعلمتها. كنت دايمًا خائفة قبل الجلسات، وكنت حس بعدم الأمان وما كان عندي ثقة بالناس، استفدت

كثير من الجلسات وتحسنت. بدني كمل شفائي. أنا عندي جرح كبير.

تعلمت الصبر من إمي. كانت كثير صبورة لأنها عاشت في بيت كبير مع عيلة كبيرة مثلي تمامًا، بس عيلتها كانت أكبر فهي علمتني كيف أصبر وإنه ما حدى بياخذ الي بده اياه بحركة وحدة. لازم نكون صبورين ومشي خطوة خطوة مشان نوصل للي بدنا اياه.

وتعلمت الكرم من أبي. كان اسمه أكرم وهو كان كريم. حتى بعد وفاته لسا عنده سمعة طيبة وكثير منيح أنه اولاده يكونوا مثله، مشان يحافظوا عسمعته الطيبة.

بنتي مراهقة هلاً ولازم إني اقعد معها وأسمعها مثل ما كنت اقعد وأحكي مع أبي. لازم أخليها تحس إني عم بسمعها. ما لازم ازعل أو عصب. لازم أفهمها ولازم لاقى طريقة مشان خليها تعرف الصح من الغلط، مثل ما كان أبي يعمل معنا.

ما بعرف ليش النظام عمل هاي الأشياء. النظام ما بيخاف الله، هو مو نظام شرعي، لو كانوا بشر أو بيحسوا بالإنسانية ما كان أذوا كثير من البشر.

سوريا كانت بلد الأمان والخير وفتحت بوابها للكل. سوريا كانت إمنا الحنونة وضممتنا كلنا.

العدالة بتتحقق عن طريق المحاكمة واعطاء الحد الأقصى من التعذيب للمجرمين. بس حتى لو صار هيك، ما رح يكون في عدالة - ما في اشي كامل لأنه ما في شي رح يرجعلي عيلتي الي ماتت.

بدني قول للعالم، ، **نحنا هون؛ اطلعوا علينا.** . في وجع جواتنا.

نحننا هون؛ اطلعوا علينا

سوريا كانت بلد الأمان و الخير و سوريا فتحت بوابها للكل. سوريا كانت أمانا الحنونة و ضمتنا كلنا.